

CARTA HN JEE NI TEE SAN PABLO

APOSTOL NUU TIMOTEO

1 Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani ri jnúhun ya. ²Te tée ri carta yáha cuájeē nuū rō Timoteo, chi cúu ndije ró nájnúhun sēhe ri siquī jeē ni scándíje ri rohó. Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha rohó, te cundáhú ni yā rohó, te sáha ya jeē coo ndeyí coo siī ni rō.

Jeē ma candíje i tāca jnúhun stáhú

³Ná ni quihin ri ichi jeē quihín ri Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rí jíin ró vijna, návāha cahān nihin ró jíin sava ñayuu yúcuan jeē ma stéén i inga jnúhun jeē tú ndaā. ⁴Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jēe yúcuan sáha jeē nahán cándajnúhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnúhun cáncandíje yó.

⁵Te ndácu ri jniñu yáha chi cúní ri jeē na cundáhú ni i jnáhan i siquī

jeē iyó ndoo íyó ndáā anuá i, te cáncandíje ndije i ya. ⁶Te sava ñayuu chi ni cajica yátá i, te ni cascuíta i jnúhun ya, ni quívicoo i nuū tāca jnúhun jeē tu ndé jéjníñu. ⁷Chi cáncuni i cuu i maestro ley yā, te ni tu cájecūhun ni i na jnúhun cúu jeē cácahān i, jíin na vé cúu jeē castéén nihin i.

⁸Te jíiní yō jeē iyó váha ley un, te núu jecūhun ni yō ndese jéjníñu. ⁹Chi cánuú sáha yó cuenta jeē tu ní jécōo ni ñin ley jeē siquī ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáncandíje ley yā, jeē cájehni tatá jíin náná, jíin jéē cájehni ndīyi. ¹⁰Te suni ni jecōo siquī ñayuu cájica jnéni, jíin téé casáha ndiyí jíin jnáhan yí, jíin ñayuu casácuíhná inga ñayuu, jíin ñayuu castáhú, jíin ñayuu cácahān nihin jnúhun yáa. Te ni jecōo siquī tāca gá ñayuu jeē casáha jniñu tu quíjnáhan jíin jnúhun ya jeē steén ndaā váha. ¹¹Te jnúhun ya un cúu jnúhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnúhun ya.

**Jeē nácuatáhú Pablo siquī jeē
ní cundáhú ni yā de**

¹²Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sāha ya jeē cuu squícu ri, te ni tejníñu ya ruhū nácani ri jñūhun ya. ¹³Te súcuan ni sāha ya jíin rí vēsú ni cahān ndevāha ri siquī yā nde saá, te ni sāha ndevāha ri jíin ñáyuu cácanđije, te xeēn ni sāha ri. Te vēsú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sāha ri. ¹⁴Súcuan ni sāha Jítóho yō jeē váha ndasí jíin rí. Te ni sāha ya jeē candíje ri jíin jéē cúndáhú ni rí jnáhan ri siquī jeē ni quívi ri ndaha Cristo Jesús.

¹⁵Te ndaā ndije cúu jñūhun yáha, te jeē cánuú candíje ndihī ñáyuu cúu: jeē ní quiji Cristo Jesús ini ñayīvi návāha jnama ya ñáyuu iyó cuéchi. Te ruhū cúu tēe jeē vihyá gā ni sāha cuéchi. ¹⁶Te ni cundáhú ni Yaā Dios ruhū, návāha jíin rúhū jeē vihyá gā ni sāha cuéchi te stéén Jesucristo ndese yōhyo íne cáhnu ni yā. Te súcuan ni sāha ya jeē cúu ri ñin ejemplo nuū tāca ñáyuu candíje ní cuáhān yō, návāha nihīn tahú i cotecu i ní cáni. ¹⁷Núu súcuan te ní cáni na cáhān yīñúhún yó jeē yóhyo luu cújéhnu máá Yaā jeē cúu Rey siquī ndihī, jeē técu ní cáni, jeē tu náā cuítī. Te tu cúu coto yó núu yā vijna, te máá ñin-ni ya iyó, te ndíchí yá. Amén.

¹⁸Nájñūhun sēhe ri cúu ró Timoteo, te jniñu yáha téjñiñu ri rohó, jéē na ndúcu ndéyí ró siquī jniñu váha. Te na cándíje vāha ró,

te na cóo ndaā anuá rō. Chi nde saá je ni cacahān tācá hermano jíin jñūhun Yaā Dios jeē súcuan condiso jniñu ró. ¹⁹Chi sava ñáyuu tuá iyó ndaā anuá i nuū yā, te ni casnāā i jñūhun cácanđije i. ²⁰Himeneo jíin Alejandro cúu uū tēe ni casáha súcuan. Te je ni siaá rí de nuū Satanás, jeē stóho ún de, návāha jíin jñúndóho ún te cutūhva de jeē ma cáhān ndevāha ga de siquī Yaā Dios.

Siquī ndese cacān tahú yō

2 Núu súcuan te xihna gā ndácu ri jeē cacān tahú rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē siquī i. ²Te cacān tahú rō jehē tāca tēe cácu jéhnu jíin jéē ndácu jniñu, návāha sāha de jeē cuu coyūcu váha yó te tú na jñúndóho coo siquī yō, te cuu chíñúhún váha yó Yaā Dios te sāha yíñúhún yó jíin táca-ni. ³Chi yāha cúu jeē váha jeē nújnahān ni Yaā Dios, Yaā jnáma yóhó. ⁴Chi máá yá cuní yā jnama ya tāca ñáyuu te cuni i ndese íyó jñūhun ndaā yā. ⁵Chi íyó ñin-ni Yaā Dios, te suni íyó ñin-ni Yaā jeē cahān jíin Yaā Dios jehē ñáyuu. Te Yaā un cúu máá Jesucristo jeē ní nduu tēe. ⁶Te ni socō yā maá yá ni jihī yā jeē ní chunaa yā cuéchi ndihī yó. Te ná ni quiji máá quívi ún, te ni quejéé ní canacani jñūhun ún. ⁷Te jeē siquí yúcuān ní jeni ya ruhū cúu ri apóstol jeē nácani ri jñūhun ya, návāha stéén rí nuū ñáyuu tācá nación jeē tu jíin jñūhun ya, jeē na cándíje i jñūhun ún te sāha i jniñu ndaā. Te siquī jeē

candíje ri Cristo te ndaā cúu jeē cahán rī.

⁸Núu súcuan te cúní rī jeē ndihī-ni lugar na cacán tahu táca tée. Te na cóo ndoo ánuá de jeē ma quití ni de ni ma tejnáhan de. ⁹Te suni súcuan táca ñahan, na cási vāha ña máá ña nájnūhun cánuú, návāha ma cóo jnūhun canu. Te ma cóndihvī ni ña jeē sáha luu ndasí ña xinī ña, chí jéē cuhun ña siquī oro chí perla chí sahma váha ga. ¹⁰Chi sa suhva na quéndōo luu ánuá ña jíin jniñu váha sáha ña, nájnūhun cánuú sáha ñahan ndoo ánuá jeē cájejniñu nuū Yaā Dios. ¹¹Te núu cáhiin ña jíin ñáyuu cascuáha jnūhun ya, te na cúní nahín ña te cuatáhú ña. ¹²Chi tu jéhe ri jnūhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúní nahín ña. ¹³Chi xihna gā Adán ni sáha ya, te sáá te ni sáha ya Eva. ¹⁴Te tu ní stáhú jexeén Adán, chi sa suhva ni stahú un ñasihí de, te ni sáha ña cuēchi. ¹⁵Te jeē scácu táca ña sēhe te coo vāha ña, te núu na quéndōo ña jíin jnūhun cándíje ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

Ndese cánuú coo tēe cándiso jniñu nuū ñáyuu cácandíje

3 Ndaā cúu jnūhun yáha: Núu iin tēe cúní de condiso jniñu de condito de ñáyuu cácandíje, te vāha jniñu ndúcú de sáha de. ²Núu súcuan te tēe ndíso jniñu nuū ñáyuu cácandíje, cánuú jeē ma cóo ni iin jeē nihín ñáyuu cuēchi siquī de. Te na cóo iin-ni ñasihí de,

te cájí coo ni de, te ndito coo xinī de, te sáha yíñúhún de. Te cánuú jeē niní cuanúu de vehe nuū ñáyuu cájica, te níní stéén vāha de jnūhun ya. ³Te ma cúu de tēe nájini, te ma tejnáhan de, te ma ndíyo ni de xūhún. Chi sa suhva coo vāha ni de, te coo vitá ni de, te ma cutóo ni de siquī xūhún. ⁴Te cánuú jéē na ndácu vāha de jniñu ini vehe de, te sáha de jeē squícu vāha sēhe de te coo yíñúhún i nuū de. ⁵Chi núu iin tēe tu jíin de ndacu vāha de jniñu ini vehe de, ¿te ndese cuu condiso jniñu de nuū ñáyuu cácandíje nuū Yaā Dios? ⁶Núu súcuan te tēe ndíso jniñu nuū ñáyuu cácandíje, ma cúu de tēe jeē saá ní candíje, chi núu súcuan te sanaa te sándúxi de máá de, te inuú-ni cuēchi jecondee siquī de jíin jéxeén. ⁷Te cánuú cuu de tēe jeē suni nde ñáyuu tu cácandíje, cuajnúhún i de, návāha ma nihín i cuēchi siquī de, te ma cúndeyí jexeén jíin de.

Ndese cánuú coo tēe cájejniñu mēhñu ñáyuu cácandíje

⁸Te suni súcuan tēe cájejniñu mēhñu ñáyuu cácandíje, cánuú jéē na cóo yíñúhún de, te na squícu de jíin jnūhun cáhán de. Te ma cúu de tēe nájini, te ni ma ndíyo ni de xūhún. ⁹Te na cuñi nihin de jíin jnūhun cándíje yó jéē ní yisāhi ndé jenahán, te na cóo ndoo anuá de. ¹⁰Te cánuú jéē xihna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cácandíje. ¹¹Te suni súcuan ñasihí de jíjnáhan ña, cánuú coo yíñúhún ña, te ma sajnúhún ña, te cájí coo ni

ña, te squícu vāha ña tǎcá-ni jniñu. ¹²Te tēe cájejniñu mēhñu ñáyuu cácandíje, na cóo ñin-ni ñasihí de, te na ndácu vāha de jniñu nuū séhe de jíin núu ñáyuu vehe de. ¹³Chi tǎca tēe cájejniñu vāha mēhñu ñáyuu cácandíje, chi vāha quéndōo yíñuhún de, te níhín de modo jeē cají gá nácani de jñuhun Cristo Jesús jeē cácandíje yó.

Jñuhun sāhi yá jeē cácandíje yó

¹⁴Te vēsú ñuhun ni rī cuajeē yachī rī coto jñáhan yó, te tēe ri jñuhun yáha cuájeē nuū rō, ¹⁵návāha núu cucuéeé rí, te je jíiní rō ndese cánuú sáha vāha ñáyuu cácuu séhe Yaā Dios. Chi máá i cácuu ñáyuu cácandíje nuū Yaā Dios, Yaā técu. Te máá i cásáha jeē iyó cutú jñuhun ndaā, chi cáhiin níhin i jíin. ¹⁶Te jendaá ndije chi jéhnun ndasí cúu jñuhun yáha jeē cácandíje yó, jeē ní yisāhi ndé jenahán:

Yaā Dios ni steén yā maá yá, chi ni nduu ya tēe,
te Espíritu ni steén jeē iyó ndáā jniñu ni sáha ya,
te tǎcá ndajéhé andiví ní cajito jniñu ní sáha ya.
Te ni jitē núu jñuhun ya nuū ñáyuu tǎcá nación,
te ni cacandíje ñáyuu ní ñáyiví núu yā,
te ni ndaa ya cuanhun yā andiví.

Siquí ñáyuu cájica yátá nuū jñuhun cácandíje yó

4 Te cají stéén Espíritu Yaā Dios jeē quiví cuándihí te coo sava ñáyuu caca yátá i nuū jñuhun cácandíje yó. Te cuatáhú i tǎca jéé

cácahān jñuhun stáhú jíin jñuhun ní castéén tachī. ²Chi cuni nahín i jñuhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ni de jíin jñuhun stáhú, te tuá sáha jíin ánuá de jeē nácani ni de. ³Te cahān de jeē cuēchi cúu jeē coo ñasihí tēe, te suni súcuan núu caji ñáyuu sava ndeyu. Te ndeyu ún chi ni sáha Yaā Dios jeē cúu ñáyuu cácandíje jeē jiní jñuhun ndaā, návāha caji i te nacuatáhú i nuū yā. ⁴Chi ndihí jeē ni sáha Yaā Dios, íyó vāha, te ma squexícó yó ni ñin, chi sa nacuatáhú yó te caji yó. ⁵Chi jíin jéé cáhu yó jñuhun Yaā Dios jíin jéé nácuatáhú yó nuū yā, te íyó ndoo ndihí-ni.

Tēe jéjniñu vāha nuū Jesucristo

⁶Te núu stéén rō jñuhun yáha núu tǎcá hermano, núu súcuan te cuu ró tēe jéjniñu vāha nuū Jesucristo, te ije ró jíin jñuhun vāha ya jeē candíje ró, chi ni cutúhva ró te ndíquín rō. ⁷Te ma quívi nduu rō jíin tǎca jñuhun jeē cúu cuento-ni jeē cájeni cāhá ni ñáyuu. Chi níin na scuáha ró ndese chiñuhún vāha ró Yaā Dios. ⁸Chi jeē scuáha yó ejercicio jeē cóo ndacuí yiquí cúñu yō, jecu-ni níhín jniñu. Te jeē scuáha yó chiñuhún vāha yó yá, suu yūcuan cúu jeē vāha níhín jniñu siquí tǎcá-ni, jeē cúu vida yáha jíin vida quiji. ⁹Te ndaā ndije cúu jñuhun yáha, te jeē cánuú candíje ndihí ñáyuu cúu. ¹⁰Te jeē siquí yáha cúu jeē sájniñu níhin yó siquí jñuhun ya te ndóho yó jéé cácahān ndevāha i nuū yō. Chi ñuhún ni yō jeē coto yó núu maá Yaā Dios, Yaā técu. Te máá yá cúu

Yaā jnáma tāca ñáyuu, te ñayuu cácaandíje jnúhun cúndáhú ni yā i, máá i cúu jeē jnáma ya.

¹¹Tāca jnúhun yáha cánuú jéē ndacu ró núu i te stéén rō. ¹²Ma cuáha ro jnúhun jeē kujéē ni ni ñi i nuū rō siquī jeē suchí ró. Chi sa coo ró ñi ejemplo nuū ñáyuu cácaandíje, jeē cúni i ndese vāha cáhán rō, ndese vāha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō.

¹³Te níni ndé ná tu jinū rī nuū rō, te condíhvī ni rō jeē cáhu ró tutu ñi nuū hermano cándutútú, jíin jéē stíhvī ni rō i, jíin jéē steén rō nuū i. ¹⁴Ma cúhuun ni rō jíin táhū jeē ni jéhe Yaā Dios nuū rō jeē nácani ró jnúhun ya. Chi tāca tée jéhnu cándiso jniñu nuū ñáyuu cácaandíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jniñu ró.

¹⁵Núu súcuan te cocuu ró jíin táca jniñu yáha, te condíhvī ni rō jíin, návāha cuni tāca ñáyuu jeē váha íje ró cuáhān rō jíin. ¹⁶Coo cuidado rō jeē caca ndaā rō jíin jéē steén vāha ró jnúhun ya, te cuiñi nihin ró jíin ndíhi. Chi núu súcuan sáha ró te quendōo vāha ánuá maá ró jíin ñáyuu chuhun ni jnúhun cáhán rō.

Ndese sáha vāha yó jíin ñáyuu cácaandíje

5 Ma cúxeēn rō nuū tāca tée jéhnu, chi sa cahān vāha ró jíin de jeē ma stívi de, nájnūhun cáhán rō jíin tátá rō. Te tāca tée suchí, suni cahān vāha ró jíin de nájnūhun jíin ñani rō. ²Te suni súcuan cahān rō jíin táca ñahan jéhnu, nájnūhun jíin náná rō. Te

suni súcuan jíin táca ñahan súchí, nájnūhun jíin cuáha ró, te yíñúhún ndajnūhun ró jíin ña.

³Te ñayuu cácaandíje na cuáha i jeē jíni ñúhún ñahan ni caquendōo ndáhú, te núu ni quendōo ndáhú ndíje ña jeē tú na ñayuu condito ña.

⁴Chi ñi ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutúhva i jeē xíhna gā nuū ñáyuu vehe i squícu i coto i. Te na nácoto i náná i tátá i siquī jeē ní cacondito ña i. Chi yāha cúu jniñu vāha jeē nújnahan ni Yaā Dios.

⁵Te ñi ñahan ní quendōo ndáhú ndíje jeē máá ñi na ña, ñúhun ni ña jeē maá Yaā Dios condito ya ña, te tu jécuiñī ña jeē jicán tahu ña nduú ñuú. ⁶Te sa suhva núu máni ndíhvī ni ña siquī tāca jéē cúsiñi ni maá-ni ña, yūcuán na te vésú técu ña, te nájnūhun je ni jihī ña.

⁷Jniñu yáha ndacu ró núu ñáyuu, návāha ma cóo cuēchi siquī i. ⁸Te núu ñi ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnahan jíin jnúhun cándíje yó, te cúu i ñi jeē neé gá vésú ñáyuu tu cácaandíje.

⁹Te ñahan viuda cuu quívi síhvī ña nuū lista ñayuu jeē cáchindéé ñahán ró jíin xúhun, te núu je ni jinu ña unī xico cuiyā, te núu ni íyo ñi-ni yī ña. ¹⁰Te suni cánuú jéē cuajnúhún ñáyuu ña jeē váha jniñu ni sáha ña, núu jeē ni scuéhnu vāha ña séhe ña, jíin jéē ní jéhe núu ña vehe nuū ñáyuu cájica, jíin jéē ní jejniñu ña nuū hermano cácaandíje, jíin jéē ní chindéé ñahán ña ñayuu cándoho jnúndóho, jíin jéē ni sáha ña tāca gā jniñu vāha.

¹¹Te tãcã ñahan viuda jeë iyó suchí gá, chi ma soó ró sihví ña nuū lista. Chi sanaa te nducú ña jeë cúsiñ ni maá-ni ña, te ma cóndihvī ni ña siquī Cristo, chi cuu ni ña condeca tucu ña tēe. ¹²Te súcuan jecondee cuēchi siquī ña, chi tu ní squícu ña jeë ni jéjnūhun ña ná ni jecosō sihví ña nuū lista. ¹³Te suni caca cuu ña tãcã-ni vehe te quee cúxí ña. Te nasūu máni jeë cáca cúxí ña, chi suni siquī jeë sajnūhún ña, te quīvi nduu ña cahān ña jnūhun jeë tu íyó váha jeë cahán ña. ¹⁴Jeë yúcuan cúni rī jeë tãcã ñahan viuda jeë iyó suchí, na nándāha ña, te scuéhnu ña sēhe, te coto váha ña vehe ña, návāha ñayuu cácuu contra ma cúu cahān i siquī ña. ¹⁵Chi sava ñahan viuda je ni cajica yátã ña te sáha ña jniñu jeë cuní Satanás.

¹⁶Te núu ñin tēe chí ñin ñahan cándíje, núu íyó ñahan viuda vehe i, te na cóto máá i ña. Te ma cóndee gasto ña siquī grupo ñayuu cácañdíje, návāha cuu cuāha váha i nuū ñahan viuda jeë tu ndé ñin coto ña.

¹⁷Te tãca tēe jéhnū cándito ñayuu cácañdíje, na jécunaā doble yāhu de, te núu cándihvī ni de cástéén de cánacani váha de jnūhun ya. ¹⁸Chi cúu nájnūhun cáhán tutu ii: Ma cánda stiquī caxīn tī trigo, núu ma cuāha ró jéē cáji tī. Te suni cáhán: Tēe jeë sajnīñu tátú, jīni ñūhún quiyāhu de, áchi.

¹⁹Ma cuajnúhún ró te núu jéquin ñayuu cuēchi siquī ñin tēe jéhnū cándito ñayuu cácañdíje te núu tu íyó úu chí úní testigo. ²⁰Te núu cásáha ñayuu cuēchi, te cánúu cuxeēn rō nuū i, jito jínúu ndīhi

ñayuu, návāha na cónso iyo sava ga i. ²¹Te cáhán ñihin ri jíin ró, jito máá Yaā Dios jíin Jítoho yō Jesucristo jíin táca ndajéhé yā jeë ní nacāji ya: Squícu váha ró jniñu yáha, te ma sáha ró cuenta ndese cúu ñin ñin i, chi ñnuú-ni sándaā rō siquī ndīhi-ni i. ²²Ma cáni yachī rō ñin tēe jeë condiso jniñu de nuū ñayuu cácañdíje, chi xihna gā coto ndee rō de. Chi sanaa te stívi de, te cuēchi de suni condee siquī rō jíin de. Te coto ró máá ró jeë ma quívi ró jíin jniñu néé.

²³Te siquī jeë núu-ni núu-ni cúhú chíji ró, te ma cóho ga rō máni ndute, chi suni coho ró jecu vino.

²⁴Cuēchi sava ñayuu chi je íyó ndijin nde ná tu quívi i nuū cúndaā cuēchi i. Te cuēchi sava ga i chi cúcuéé te natūu nahín. ²⁵Te suni súcuan tãcã jniñu váha, chi íyó ndijin. Te vésú ná tu natūu jniñu váha ún, te ma cúu quisāhi ní cáni, chi natūu nahín.

6 Tãca ñayuu cácuu mozo, na cóo yíñūhún váha i nuū patrón i, návāha ma cahán neé ñayuu siquī Yaā Dios jíin siquī jnūhun ya jeë castéén yō. ²Te mozo jeë yíhi nuū patrón cácañdíje, ma cáni ni i jeë cūhva-ni sáha yíñūhún i nuū de siquī jeë hermano cácañdíje cácuu de. Chi sa cuajniñu váha ga i nuū de, chí tēe cándíje tēe manī i jíin cúu tãca tēe un jéē sajnīñu i nuū. Jnūhun yáha stéén rō te stíhvī ni rō i.

**Siquī jeë chíñūhún váha
yó yá te cusīñ ni yō jíin
cūhva jeë névāha-ni yó**

³Te núu ndé tēe stéén de jnūhun tú ndaā jeë tu quíjnāhan jíin

jnúhun vāha ndaā maá Jítóho yō
 Jesucristo, jíin jnúhun ni steén
 Yaā Dios jeē cácanđije yó, ⁴núu
 súcuan te máni tēe ndúxí tēe tu
 jécúhun cuítí ni cúu de. Chi cánée
 xíní de, chi máni cúní de tejnáhan
 de siquī tāca jnúhun stéén de.
 Te tācá un sáha jeē cácuésún
 ni, jíin jéē cátejnáhan, jíin jéē
 cácahān ndevāha, jíin jéē cájeni
 néé ni siquī jnáhan, ⁵jíin jéē máni
 cástáhān jnáhan. Súcuan cása
 tēe jeē ní ndunée xíní, jeē tu cájini
 jnúhun ndaā. Te cájeni ni de jeē
 nihín de cuehē xúhun siquī jnúhun
 cácanđije de stéén de. Na cújiyo
 ró núu ñayuu cándāa súcuan. ⁶Te
 jendaá jeē yóhyo vāha quéndōo yó
 te núu chíñúhún váha yó yá, te núu
 cúsiñ ni yō jíin cúhva jeē névāha-ni
 yó. ⁷Chi tú na vé ni cácu yó jíin
 ñayívi yáha, ni tú na vé condiso
 yó quíhín yō jíin núu na cúu yō.
⁸Te núu íyó jéē cáji yō jeē cusúcún
 yó, te na cúsiñ ni yō jíin yúcuan-ni.
⁹Chi ñayuu jeē cuní cucúca, chi
 yachí quívi i cuēchi jeē jíto ndee
 jexeén i. Te quívi i jíin cuéhē jniñu
 cánée jniñu stívi jéē ndíyo ni i.
 Te tācá un sáha jeē tíví ñáyuu te
 jnahnū ndetū i. ¹⁰Chi jeē ndíyo ni
 yō xúhún, yúcuan sáha jeē quejée
 tāca jniñu néé. Te sava ñayuu jeē
 ndíyo ni xúhún, ni castóo i jnúhun
 cácanđije i, te ni canihín i cuehē
 ndasí jnúndóho.

**Jeē na ndúcú ndéyí yó
 siquī jnúhun cándíje yó**

¹¹Te róhó chi tēe jéjníñu nuū Yaā
 Dios cúu ró, te cunu ró coto ró tāca
 cuēchi yáha. Te condiquín rō jniñu
 ndaā, te chíñúhún váha ró Yaā Dios,

te candíje vāha ró, te cundáhú ni
 rō jnáhan ró, te cuandeyí ni rō, te
 coo vítá ni rō. ¹²Te nducú ndéyí ró
 siquī jnúhun cándíje yó yá. Te cuiñí
 nihin ró jíin jnúhun jeē ni níhín
 tahu yō cotecu yō níí cáni. Chi jeē
 yúcuan cúu jeē ní cana ya rohó, te
 cájí ní cahān rō jeē vāha cándíje
 ró yá, jíto jínúu cuehē ñayuu. ¹³Te
 cáhān nihin ri jíin ró, jíto máá
 Yaā Dios, Yaā jeē sáha jeē técu
 tācá-ni, jíin Jesucristo, Yaā jeē cájí
 ní cahān yā ni nacani ya jnúhun
 vāha nuū Poncio Pilato. ¹⁴Squícu
 vāha ró jniñu ndácu ya nuū rō, te
 ma stívi ró sáha ró, návāha ma
 cahān ñayuu cuēchi siquī rō. Te
 súcuan sáha ró níí ndé quiví ndíji
 Jítóho yō Jesucristo. ¹⁵Chi quíji
 ndíjin yā maá quíví jeē ní jeni Yaā
 Dios. Te Yaā Dios chi máá ñin-ni
 ya cúu Yaā yóhyo ndetū, te jnái ya
 ndíhi poder. Te cúu ya Rey nuū
 tāca rey, jíin Jítóho nuū tāca jítoho.
¹⁶Te máñúhún-ni ya cúu jeē iyó níí
 cáni. Te ndée yá ñin lugar nuū ndíi
 ndaxín, nuū ma cúu quívi yó. Te
 ni ñin ñayuu ñayívi yáha tu ní jíto
 cuítí i nuū yā, te ni ma cúu coto i
 nuū yā. Te níí cáni na cóo yíñúhún
 yó nuū yā, chi jnái máá yá poder níí
 cáni. Amén.

¹⁷Te cahān rō jíin ñáyuu cucá
 ndajniñu ñayívi yáha, jéē ma
 cúndúxí i. Te ma tēnuū i xúhún i,
 chi yachí naa ún. Chi sa suhva na
 tēnuū i jeē coo vāha i sáha Yaā Dios,
 Yaā técu, chi máá yá jéhe cuehē
 yā tācá-ni jeē cúsiñ ni yō jíin. ¹⁸Te
 ndacu ró jniñu nuū i jeē na sáha
 vāha i, chi jeē sacúca ndíje i máá i
 cúu jeē sáha i tācá jniñu váha. Te
 na cúu i ñayuu vāha ni jeē cuáha i

jeē cúu jnáhan i. ¹⁹Te súcuan caya i cuehē jniñu váha jeē coo cúcá i nuū yā ní tiempo jeē quíji. Te nihīn tahu i cotecu i ní cání.

Jniñu sándīhi ndácu

Pablo nuū Timoteo

²⁰Te róhó Timoteo, condito ró táca jniñu ní chihi ya ndaha ró. Te ma quívī nduu rō jíin táca

jnúhun cāhá-ni, cuenta ñayīvi yáha, jíin táca jnúhun stáhú jéē cácahān i jeē jnúhun ndíchí ndāā cúu. ²¹Chi sava ñayuu cándiquīn tāca jnúhun yáha, ni cajica yátá i ni castóo i jnūhun cácaandíje i ya.

Te ñúhun ni rī jeē Yaā Dios na sáha ga yā jeē váha róhó. Súcuan na cóo. Amén.